

1883

吳都文粹續集

吳郡文粹卷之三

三

總校官進士臣繆琪

校對官主簿臣汪日贊

謄錄監生臣沈應麟

欽定四庫全書

吳郡文粹續集卷二十一

明 錢穀 撰

山水

遊郡西諸山記

都穆

弘治己酉秋九月甲戌予與客汎舟將遍遊吳郡西諸
山客曰虎邱之勝甲吳下且密邇闌闌遊必自虎邱始
予諾焉亭午至山下觀憨憨泉泉為人投瓦礫塞之將
泥不食從石旁上東山廟即短簿祠中龐然禰以土偶有老

僧方閉關坐穴中與語頗可聽下東山北行登千人石
旁有古木根出如蟠虬一本而為榦者三經清遠道士
放鶴磯澗灌莽生焉後人亭其上既而登五聖臺僧
供茗命前導西南行至一菴甚幽寂蓋宋和靖書院舊
址也悵惋久之南行沿小溪復上千人石度石梁酌陸
羽泉近庸僧屋其畔頗減清冽出觀劍池左石刻虎邱
劍池四大字是顏魯公書上兩崖壁立數仞勢欲崩裂
其陰多昔人題名衆恐不能久讀遂登可中亭北有李

陽水篆生公講臺字分鐫四石而亡其一衆皆從故道
下去時已逼暝予欲止宿客不可乃返乙亥乃泊虎邱
午食出射瀆大風西北來舟遲遲行絳屢斷續西望天
平乍粵秦餘杭諸山如龍遊馬逸應接不暇過潞墅入
竹青塘而西日光反射影在山半霞彩絢爛丹青襍施
工不能繪至通安橋已昏黑夜深抵友人朱氏宿丙子
早食出朱墅北泛彭山堰午西風甚急遂由堰西北約
五里至陳湖莊復五里由望湖橋南出游湖從曲港登

新豐南山共坐苔石山人有牧羊者予問瀕湖諸山始知高出鄧尉者曰銅坑山亞銅坑曰安山牛城嘴居游湖北與安山對峙如兩峽然而其西接太湖極北青霞一抹視洞庭兩山尤遠者無錫之九龍山也下山歡飲盡醉丁丑早霧翳翳布空中疑有變少焉日光矐矐衆遊興勃發由謝莊西行復經游湖南過陸家港二里入西堰水益緩山益近岡嶺稠疊橫迴峭拔呈技獻巧殆不可狀而浮圖七級聳龜峰巔影落水中予笑曰此王

摩詰得意筆也泊泰定橋登虎山里許至光福寺主僧
聞客至出速入方丈山峙其前者名鉢盂其左鄧尉山
也僻有元人聯句詩多剝落皆不著氏名其字書類王
豫章有墨沼從窻隙窺之僧云傳為顧野王研池殆或
然也過齋堂讀唐進士顧在鎔詩刻遂上龜山坐浮圖
下浮圖頂有巢鶴三見人嘎嘎作聲衆方欲酒僧謂七
寶泉在鄧尉東麓不三里而近共出登舟經東堰已半
淤塞蘆葦叢生其中視西堰少劣至則捨舟導山徑行

夾道多古梅長松入僧菴有雙柿丹寔累累可愛上山
行循竹間有亭憇焉其後即七寶泉泉生石間環甃以
石形如滿月深尺許掬飲甚甘僧接竹引之然不知發
自何處且弔陸子之不能遭與茲泉之不遭也予索筆
題名亭上暮還光福方丈戊寅至姚家河陸行數里遊
奉慈菴中故有養賢樓元季里儒徐良夫好客四方賢
士多集樓上今亡獨扁存堂背白山茶枇杷臘梅列植
左右出僧欲導觀山上泉不果三里至玄墓山從松篠

間偃僂而上山多楊梅梅樹湖水明滅樹間衆冉冉如
空中行約一里入西塔院小飲晚院之僧具湯沐宿焉
已卯自西而南四百步路多古梅皆螭蟠蛟結蒼蘚被
之如鱗出大道東北千步有長松五株鷹巢其一又西
北二百步度石梁上萬佛閣南望太湖法華山橫亘其
中漁舟數十出沒若鳬雁然而洞庭長沙葉余梅灣諸
山隱隱在烟霧間詩思頓發自北而東二百步有僧揖入
小閣閣視萬佛十才一二然所據地高出木杪山四面

環之如玦景特奇僧飯客閣上仍出松花餅客作詩有
不見太湖真面目眼前終恨法華山之句子不以為然
乃作詩為法華訟寃西行可百步至僧房其扁曰天開
畫圖見湖最多兼見小橫山一抹由禪堂西南三百二
十步有老僧房前美竹數百挺與松栢爭長地窪然下
衆嘯咏焉又西三百步經僧房六已日暮不及遊還塔
院宿庚辰僧陪客下山西行復經奉慈菴謁宋金紫光
祿大夫黃某墓其傍有香火院僧盡出斷碑五六橫草

莽間蓋玄墓至是行四里至銅坑山其山一名銅井僧
云高二百丈予與客取捷上由別道山多亂石且峻拔
行者多顛踣每一人踣衆皆大笑至僧菴觀所謂銅井
已無水深可丈餘上大石若將壓者予令童子入井大
呼聲不得出如甕中山頂多奇石可望見二百里羣山
在其下小山浮湖中如杯人人大快以為平生奇觀適
山人送酒至遂剖橘作杯飲皆盡興菴僧煮菜供午食
循道至山半勢亦斗峻皆掖以童子狼狽而下回視莫

不心掉更慶以為無虞去銅坑東北三里謁宋章都官墓抵包河登舟復從西堰過秦定橋東北七里還朱氏宿辛巳朱氏東南三里至蜀山訪王清獻公玄孫晉索其舊藏出清獻畫像及孝感詩族譜閱之門內有望像置壁脚亦云是清獻公牆角塑像為尼相者清獻母張夫人也晉言清獻父死海上張氏年甫三十七抱清獻入覲時清獻生才三歲元主恐張氏二志命殿前祝髮為比丘尼賜號無為大師往往吳中妙湛禪寺出門讀

草間碑碑凡三其一為大師塔銘鄧文原撰午還朱氏
壬午復經彭山堰行八九里艤舟又二里至秦餘杭山
夾道松如步障上六百步息足僧舍復二百三十步至
大石下有泉二泓其一為雲泉石錯互若頰頤斷齧從
其後視之又若狻猊印首尻下其前磐石如卧鼓可坐
二三十人入雲泉菴躋石級有古梅生石間東折石一
股西跨類猛士跂足立人行其下又折而西鑿石為階
旁設以闌杙枕不可凭屋壁讀李武選吳太史張子靜

史明古諸公聯句東行有巨石閣屋上欲墮又上得大
石岩上俯下嵌中像開山像衆小憇午酌菴之北樓日
暮下山與諸客別是夕宿通安橋癸未入城蓋自甲戌
至癸未凡十日皆風日清美舟楫往還百數十里歷名
山六小山二而諸客者皆衣冠詳雅從容尊俎間莫不
目飽意滿充然有得而忘其疲其慶幸不既多乎遂次
第筆之以貽同志

紀遊

朱存理

端陽前一日過西崦訪朱叔英西崦舊遊也叔英故人
也叔英喜予至速予登其新堂拜尊人八十三翁頃具
蒲觴為飲襟以山果溪鮮勸酬盡醉留別有詩云西崦
重遊日東城閣別時新堂陪杖几舊譜合宗支碧柳垂
書幌紅葵映酒卮烟消聽欸乃風遠送吾伊好古吾同
志尋幽君有期歸舟山色暝正是雨催詩予之來也為
訪吳中故家文獻叔英不以為迂言王清獻公家蜀山
不二里家有藏譜乃為之假故有好古吾同志之句飲

散登舟將數里至光福尋張雪槎雪槎與予論別將三十餘載相見各驚皤然為詢野王雪槎告以故吾張氏從顧姓今始復之矣尚不忘其初作推本堂有瓠翁首倡五言請予和之不及書即延入鄧尉山後鳳岡之前一草亭中治鷄黍相款讀其所自為草亭記雪槎請留題予羨其老年有此行樂喜為之賦七言一章鄧尉嵯峨萬疊青鳳岡猶見地稱靈梅林數畝開新徑蘿薜千尋闢廣庭博望古槎仍剡曲醉翁今記似蘭亭岩花谷